

PERANG DINGIN 2 PARTI BN

KUALA LUMPUR, Khamis — Perang dingin antara MCA dan Gerakan kini makin hebat, khususnya bila keduanya berterusan cabar mencabar mengenai penggunaan simbol parti dalam pilihanraya umum akan datang.

Kedua-dua komponen Barisan Nasional yang disokong oleh masyarakat Cina ini yakin mereka akan diizinkan menggunakan simbol parti masing-masing kerana perkara sedemikian pernah terjadi antara Berjaya dan USNO di Sabah.

Bagaimanapun, suasana perlumbaan yang sengit antara mereka, kini membimbangkan pucuk pimpinan yang diketuai oleh Datuk Seri Dr. Mahathir Mohamad.

Presiden MCA, Datuk Lee San Choon dan Presiden Gerakan, Datuk Dr. Lim Keng Yaik, dipanggil ke pertemuan 'enam mata' dengan Timbalan Perdana Menteri, Datuk Musa Hitam, 18 Januari lalu.

Dipercayai Datuk Musa ingin mengetahui sebab-sebab kedua komponen BN itu 'berkeras' mahu menggunakan simbol sendiri dalam pilihanraya akan datang, terutama sekali di Pulau Pinang.

Pertemuan itu disahkan oleh pihak Gerakan di sini hari ini. Bagaimanapun, kedua pihak masih belum mengetahui apakah keputusan pertemuan tersebut.

Pihak MCA ketika

Oleh RUHANIE HAJI AHMAD

diminta mengulas masalah perang dingin dengan Gerakan menegaskan, perkara tersebut sebenarnya hanya perundingan dan bukannya 'keributan'.

Seorang pegawai MCA di sini berkata, pihaknya mahukan Gerakan bersikap adil dalam pembahagian kerusi Dewan Negeri dan Parlimen di Pulau Pinang dalam pemilihan akan datang.

Sekiranya Gerakan enggan berbuat demikian, katanya, MCA mencabar parti tersebut supaya bertanding dengan MCA dan menggunakan simbol masing-masing di Pulau Pinang, untuk menentukan parti manakah yang akan disokong rakyat.

Setuju

Pegawai MCA itu mendakwa, Gerakan setuju menggunakan simbol parti sendiri, tetapi di seluruh negara dan bukannya terhad di Pulau Pinang sahaja.

Bagaimanapun, tambahnya, belum terdapat keputusan muktamad mengenai perkara ini.

Seorang pegawai kepada seorang Menteri Gerakan di sini pula berkata, Gerakan dicabar oleh MCA untuk bertanding atas simbol parti dan bukannya atas simbol Dacing BN.

Beliau membayangkan, segala keributan, sekiranya wujud adalah hasil cabaran MCA.

Umpamanya, Ketua Pemuda MCA, Datuk Lee Kim Sai hari ini dilaporkan oleh sebuah akhbar tempatan

sebagai berkata, partingnya tidak akan melepaskan kerusi Parlimen Ulu Selangor.

Kawasan Ulu Selangor diwakili oleh Datuk Michael Chen dari Gerakan yang memenangi kerusi tersebut dalam pilihanraya 1978 menerusi tiket MCA.

Datuk Lee Kim Sai berkata, partinya tetap

mempertahankan kerusi itu sama ada bertanding atas simbol BN ataupun simbol MCA sendiri.

Ibupejabat BN pula, ketika diminta mengulas masalah perang dingin MCA-Gerakan sekarang berkata, ia sungguh dikesali kerana sepatutnya komponen BN sentiasa bersatupadu dan bukannya bercakaran sehingga mungkin menguntungkan pihak lawan.